

SESSIONI URDINARIA DI U 16 DI NUVEMBRI 2022

N° 2022 /M3 /34

DUMANDA À BOCCA DIPUSITATA DA LISA SALINI PÀ U GRUPPU SOLCU NAZIUNALISTU

Ughjettu : messa in piazza di quotas turisticchi

O sgiò presidenti di u Cunsigliu esecutivu,

L'annata di u 2022 si presenta cum'è a più alta in termini di frequentazioni turistica in Corsica.

Quist'annu, i sciffri di a staghjoni sò affari à fà trimulà di paura è di pinseri l'eculugisti è d'allegria i cummercianti. Par un dettu, eccu i sciffri di l'avvioni di a noscia cumpagnia Air corsica, trà Aprili è Uttrovi :

Circa 660 000 passaghjeri da Marseglia o Nizza ;
280 000 da Liò, Tulosa, Tulò, Clermont Ferrandi, Roma, Zurich è Brusselli. ;
È 890 000 da Parighji.

Facini 1 830 000 passaghjeri, à quissi mancani quiddi di i voli trà a Corsica è Londres, Vienne è Goteborg chì sò stati pieni à 90 %.

È ùn sò cà i sciffri d'Air Corsica, chì, in annata nurmali, raprisenta 50% di u trasporti di i passageri aerei. Ben sicuru, ci voli dopu à aghjunghja i passaghjeri maritimi, senza mintuvà a problematica di i cruceru.

Si capisci bè chì quist'annu, turisti ci n'era abbastanza pà fà funziunà l'ecunomia. Ci n'era assai. Ci n'era pò darsi ancu troppu ?

Parchì sè u mondu c'hè pà cùntinuà à fà campà a Corsica à l'altezza di 39 % di u PIB, u mondu c'hè dinò in i siti naturali.

Fora di a problematica ecologica, a calca di turisti, prisenti dappertuttu pà un periodu di tempu chì s'allonga ogni annu, pruduci una frustrazioni chì crescita in u senu di u populu corsu. I marini sò pieni, quissa l'avemu accittata dapoi un mumentu, ma avà i paesi sò pieni, i muntagni sò pieni, acqua ùn ci n'hè più abbastanza pà tuttu u mondu, à cummencià pà l'agricultori. È i Corsi facini sempri di più sforzi pà piattà si, pà salvà l'acqua è l'energia, pà permetta a frenesia di u turisimu senza avè nisuna speranza d'un migliuramentu.

Un'argumentazioni di più annant'à i pericoli d'una frequentazioni tropp'impurtanti saria inersa dunqua preferiscu discorra di soluzioni. Parchì oghji, i sciffri testimonieghjanu di u bisognu urgenti di truvà è di metta in piazza parechji soluzioni. U scopu hè d'appacià a sucietà, sempri spartuta trà Ecunomia è eculugia, truvendu una soluzioni pà fà calà i prublema lasciendu travaddà i corsi.

È ghjustappuntu, ci n'hè una chì era stata pruposta è vutata in issu emiciculu, quidda di i quotas in certi siti turistici troppu frequentati. U scopu era d'arrigulà u numeru di parsoni prisenti in u stessu locu à u stessu mumentu, in i siti di prova di Bavedda, di a Restonica è di i Lavezzi.

U prublema essendu chì, d'appressu à un riportu di Via Stella, in i Lavezzi i quota ùn sò mai stati messi in piazza.

Dunqua, parechji dumandi in issa dumanda à bocca :

- Prima, chì n'hè di a messa in piazza di i quota in i siti scelti è di i resultati nantu à a frequentazioni par via d'issi quota?
- Siconda, in i lochi induva ùn sò micca stati messi in piazza, chì sò stati i prublema è chì sò i soluzioni privisti ? Chì pudemu aspittà pà 2023 ?
- Infini, chì sò i prospettivi, in particulari in u cuntestu di i negozianti incù u governu francesi, d'evoluzioni leghjislativi è riglamintarii pà allargà u prucessu di quota chì sariani necessari à un liveddu più largu ?